

FILED

MAR 17 2025

ASSISTANT CLERK OF COURTS
REPUBLIC OF THE MARSHALL ISLANDS

**IN THE TRADITIONAL RIGHTS COURT
OF THE
REPUBLIC OF THE MARSHALL ISLANDS**

SOPHIA LELWOJ, (ilo etan Tarbwij Lelwoj), Riabnono, v. NERISSA HELIES im CARMEN SAMSON, Rijumae Abnono.	CIVIL ACTION NO. 2023-01257 HCT/LAND/MAJ LEMNAK IM UWAK EO AN COURT EO AN MANIT
--	---

**To: Hon. Carl B. Ingram, Chief Justice of the High Court
Mrs. Tiantaake Beero-Sexton, MLSC Staff Attorney, Counsel for Plaintiff
Mr. Karotu Tiba, Public Defender, Counsel for Defendants**

I. Naan in Kopellok

Case in ej walok jen tarbok eo ikotaan Riabnono eo, Sophia Lelwoj (“Sophia”), ilo etan lellap eo jinen, Tarbwij Lelwoj (“Tarbwij”), nae Rijumae Abnono rein, Nerissa Helies (“Nerissa”) im Alap Carmen Samson (“Alap Carmen”), elkin an Rijumae Abnono rein jilkinlok im kadiwoj Sophia jen imon jokwe eo ear mour im bed ie iumin 27 iio. Abnono in ej ikijen won eo ekkar an bok imon jokwe eo im ej bed ion Teron Weto ilo bukun in Rita, aelon in Majuro, Republic eo An Marshall Islands (“mwin etarbok”).

II. Unin Kenono Ko / Kajitok Ko

Emoj letok eddo nan Court in bwe en bukot mejlan im uake kajitok kein emoj laajrak i ekkar nan manit im imenene ko an aelon kein. Errein ej kajitok ko:

1. Elane juon armij ej kalok juon an imon jokwe ilo bwidej eo im ejelok an maron ie iumin mantin Majol, im elkin ej etal jen mwin ak emoj an likit juon ian ro uwaan bamle eo an bwe en alal im lale iumin juon tore eo eaitok, ekkar nan manit, ejimwe ke an Alap eo kile im ba ke armij eo ear kalok mwin emoj an etal jen e im joloke, innem ej boke mwin im ajelok nan armij eo jen bamle eo im ear alal im kojbarok mwin?

2. Elane uak eo an Kajitok 1 ej “aet”, innem, iumin mantin Majol, ejimwe im ekkar ke an Alap eo ej binej jenkwon eo im ear ajelok imon jokwe in nan rialal eo jen bamle eo, jilkinlok rialal eo im bamle eo an jen imon jokwe eo im koroole nan armij eo ear kalok mwin?
3. Iumin mantin Majol, ewor ke an Alap eo maron nan an kotlok an rialal eo an imon jokwe eo kokaal e im kolaplok mwin?
4. Elane uak eo an Kajitok 3 ej “aet”, iumin mantin Majol, ewor ke an Alap eo ak rialal eo eddo in kajitok melim eo an armij eo ear kalok imon jokwe eo (im ejelok an maron ion bwidej eo) mokta jen an Alap eo lelok melim bwe en jino komman jermal in kokaal e im kolaplok mwin?
5. Elane uak eo an Kajitok 3 ej “aet” im uak eo an Kajitok 4 ej “jaab”, kio ewor ke an Alap eo tokelik maron nan an ajelok mwin nan rialal eo im ear bok eddo in kommane jermal nan kokaal im kolaplok mwin im jab armij eo ear kalok mwin jinoin, ilo an kar ejelok enaan nan armij eo ear kalok mwin jinoin jen ibben rialal eo ak Alap eo?
6. Elane uak eo an Kajitok 3 ej “aet” im uak eo an Kajitok 4 ej “aet”, kio ewor ke an Alap eo tokelik maron nan an ajelok mwin nan rialal eo im ear bok eddo in jermal in kokaal e im kolaplok mwin, ilo an kar ejelok enaan nan armij eo ear kalok mwin jinoin im ilo an ejelok melim ear lelok nan rialal eo im Alap eo?
7. Ilo an mej im jako rialal eo im mwin ear etal nan e bwe en kojbaroke ilo tore eo armij eo ear kalok mwin ear emakit jen Teron Weto, iumin mantin Majol, melim eo jen Alap eo ear ke bareinwot etal nan rialal eo jen Alap eo, bareinwot etal nan eo ear bok jikin rialal eo im men ko mweien, elane ear ejelok kojela im enaan lok nan ibben armij eo ear kalok mwin jinoin?
8. Ewor ta, ak jabrewot wawein ko, iumin mantin Majol, ikijen kajitok eo nan lale won eo ejimwe im ekkar bwe en bok imon jokwe in emoj kalok ilo bwidej eo ejelok an eo ear kaloke maron ion, im ilo an lonlok jen juon uwaan rein im rekar bok eddo in komman e jermal in kokaal im kolaplok ko ilo mwin, ekkar nan melim eo lelok jen Alap eo?
9. Ekkar nan mantin Majol, won eo ikotaan Tarbwij Lelwoj im Nerissa Helies, ej ekkar tata bwe en bok mwin ewor tarbok kake im ej bed ion Teron Weto, bukun in Rita, ilo aelon in Majuro?

Kin un kein emoj laajraki lal, Court in ej loe bwe Tarbwij Lelwoj, eo im Sophia Lelwoj ej jijet ilo etan, ej e eo ebed jimwe im maron eo nan an bed imon jokwe eo ion Teron ekkar nan manit im imenene ko ad.

III. Etale Melele ko Remool

A. Elane juon armij ej kalok juon an imon jokwe ilo bwidej eo ejelok an maron ie iumin mantin Majol, im elkin ej etal jen mwin ak emoj an likit juon ian ro uwan bamle eo an bwe en alal im lale iumin juon tore eo eaitok, ekkar nan manit, ejimwe im ekkar ke an Alap eo ba ke armij eo ear kalok mwin emoj an etal jen e im joloke, innem ej boke mwin innem ajelok nan armij eo jen bamle eo im ear alal im kojbarok mwin?

- Aet, ewor an Alap eo maron iumin manit nan an kile im ba ke emoj joloke imon jokwe in, innem ej boke, im ajelok nan bar juon armij ilo an wor un ko iumin manit.

Iumin mantin Majol, maron eo nan komman karokan jermal in ajelok bwidej eo ebed ibben ro aer bwidej eo. Court in ej kile an pade kein jimor erra ibben dron ke ejelok Irojilaplap ak Irojiedrik ion Teron, im Rijumae Abnono Carmen Samson (“Alap Carmen”) ej Alap eo rainin, im eo ej kabwijor maron eo an Senior Dri Jermal ej Betty Tibon Imaikta (“SDJ Betty”). Kin menin, ilo an ejelok Irojilaplap ak Irojiedrik, maron ko ion Teron rej bed ibben Alap Carmen im SDJ Betty. Const. Art. X, Sec. 1(2).

Court in ej loe bwe ro rar maron moktalok jen Alap Carmen im SDJ Betty, ak Alap Jelke Jenre im Senior Dri Jermal Labi Tibon, rar komaron e Tarina B. Jokon, ak aat eo juon etan, Tarina Abo (“Tarina”), rialal eo ear lale im kojbarok imon jokwe in moktata, nan an jortoklik kake mwin ilo 1992 eo kin jonan muri in \$29,149.17 ibben Marshall Islands Development Bank (“MIDB”) bwe en maron in kokaal e mwin.¹ Wawein in ej alikar ilo kein kamool eo an

¹ Plaintiff’s Exhibit B.

Riabnono eo, Plaintiff's Exhibit B, eo im Rijumae Abnono rein rej kwalok aer jab erra kake im jumae an drelon einwot juon kein kamool ilo naan in kojjemlok ko aer rar droor ilo jeje.²

Court in ej etale naan kein an Rijumae Abnono rein ilo aer jab erra ijin. Ilo pepa eo ej kwalok naan in kojjemlok ko aer, *Defendants' Closing Statement*, Rijumae Abnono rein rej ba bwe Plaintiff's Exhibit B ejjab maron in drelon einwot juon kein kamool iumin Rule 902(2) in kakien eo ikijen kein kamool ko naetan Rules of Evidence.³ Botab Court in ej kadrelon kein kamool in, Plaintiff's Exhibit B iumin Rule 15(b) in kakien eo ikijen Court eo an Manit naetan, Traditional Rights Court Rules of Procedures.

Kein kamool eo naetan Plaintiff's Exhibit B, ej juon pepa eo ej kwalok im kalikar ke Tarina ear bok melim jen ro aer bwidej eo nan an maron in jortoklik kake im muri ikijen imon jokwe in ilo 1992 eo im wawein in, Court in ej loe, bwe an drelon einwot juon kein kamool, ejjab juon jekjek eo enaj kalijoklok nan pade kein ilo case in. Bareinwot, Rijumae Abnono rein rar likjab in lelontak jabrewot naan in jumae ko ilo ien ronjake eo, botap rekar kwalok ilo naan ke ejelok aer abnono nae an drelon pepa in einwot juon kein kamool. Im einwot ke Rijumae Abnono rein rekar maron in etale uak ko an ri-kamool ro rekar kamool ikijen Exhibit B ilo ien ronjake eo. Ear bareinwot etal elap ien nan aer karon lok bank eo nan an itok juon armij jen e bwe en kamool einwot juon eo ej kamool nae naan in kamool ko rar walok ilo ien ronjake eo. Ak ejja einwot moktalok, ke ej etal kajitok eo, Rijumae Abnono rein rekar jab lemaantak aer ri-kamool nan etale im jumae naan in kamool ko ikijen pepa eo.

Im ejja ilo wawein in wot, Court in ej loe bwe naan in kamool ko an ri-kamool eo an Riabnono eo, SDJ Betty, rekobwaa nan rie pepa eo ke Alap Jelke Jenre im Senior Dri Jerbal Labi

² Defendants' Closing Statement (Dft.'s Clos. Stmt., filed Feb. 06, 2025).

³ Dft.'s Clos. Stmt., filed Feb. 06, 2025, ilo 4-5.

Tibon, rar droor eltan peierro ie im jain i kein kamool eo, Plaintiff's Exhibit B. *Jorbon v. Akira*, CA 2020-329.

Ekkar nan naan in kamool ko an SDJ Betty, kora eo erittotata nejin Senior Dri Jerbal Labi Tibon, ej kile eltan pein lollap eo jemen ekoba alap eo ilo pepa eo. Court in kile melele kein an SDJ Betty einwot juon eo elon alen an bed iturin alap eo im lollap eo jemen ilo aer jain im droor eltan peier ilo pepa ko. *Id.*

Ekkar nan case eo an High Court ilo Civil Action 2020-329, *Jorbon v. Akira*, Irojiedrik eo ear binej jenkwon leroij eo jinen ear kamool im ba bwe ej kile eltan pein Leroij Kalora Zaion ilo Bill of Sale eo einwot ke emoj an kar loe ilo pepa in bwidej ko an bamle eo.

Mantin Majol ej bareinwot kalikar im ba bwe ebed ibben juon alap maron im eddo eo nan lale jabrewot karokan jermal ko ilo bwidej eo einwot ke ej jeban bwij eo. Maron in ekoba an komman karokan ajej ko ion bwidej nan kalok imon jokwe ko im kojbarok aenemon im jokane eo ilo bwidej eo, im wawein ko eierlok wot, ilo an kobalok ibben maron ko jet ion bwidej eo. Court in ej loe bwe maron in ej alikar an komman ibben alap im senior dri jermal ro jimor ilo an walok im alikar ilo kein kamool eo, Plaintiff's Exhibit B. *Rusin v. Jeilar, et al.*, CA 2023-0393; *Peter v. Napking, et al.*, CA 06-163 (09/16/08); *Lokar v. Latak*, 6 TTR 375; J.A. Tobin, *Land Tenure in the Marshall Islands*, 12, 63 (1956).

Ilo case eo an *Lokar v. Latak*, 6 TTR 375, Court eo ear ba bwe ewor an alap eo maron nan an droor juon armij eo ejelok an maron ilo bwidej eo im lelok melim nan an kalok juon an imon jokwe ilo bwidej eo nan an mour im bed ibben bamle eo an. Court eo ear ba bwe maron in ej bareinwot koba tok ibben maron eo nan komakit armij eo ilo an ejelok un ko rellap ekkar nan manit. Botap ilo case in, ear jab wor un ko rejekkar iumin manit nan komakit armij jen bwidej eo. Ijelokin wot un in ke Nerissa ear emakit jen mwin im lelok eddo eo nan kora ro jatin iumin

40 jima iio ko. Ear ejelok an itoklimo im kea kake jekjek im wawein ko rar walok, ak inebata im kea ke kora ro jatin rar loe bwe emenin aikuij bwe ren jortoklik kake mwin nan aer maron kommane jermal in kokaal ko. Wawein kein aolep rej kalikar nan Court in ke ear ejelok an inebata kake im kea kin aolep jekjek im wawein ko rekar bok jikier ikijen mwin.

Ear alikar jen naan in kamool ko ke ewor an alap eo maron in bok mwin einwot ke emoj etal jene im joloke, im elane Tarbwij ear jab kollaik muri ko ilo etan Tarina, innem MIDB emaron kar bareinwot boke mwin.

Aolep wawein kein jimor, Court in ej loe bwe Nerissa ear likjab in kommani eddo ko an nan mwin im mantin bed ion bwidej ekkar nan manit.

Ebin an Court in bok kolmenlokjen in, einwot an ba bwe mwin ej imon, ke Nerissa ear jab nan jidrik ba im kalikar ke mwin ej imon ak eoron enaan kake ilo aolep tore im iio ko ej etal itok. Ear ba ilo naan in kamool ko an ke ear bok melim jen ibben Labi Tibon, eo im ear kabwijer maron eo an Senior Dri Jermal ilo tore eo, ijowotke, ear jab maron in lemaantak kein kamool ko ilo jeje nan kalikar ke ear bar etal melim jen ibben Alap nan an kalok mwin. Mekarta, Court in ej loe bwe kein kamool ko jet rej rie naan ko an Nerissa ke e eo ear kalok imon jokwe in.

Bareinwot, Court in ej loe bwe jemlok eo an Alap eo, ekoba Senior Dri Jermal eo, ikijen an Nerissa kar emakit jen im joloke mwin, ej juon jemlok eo im ej wor bedbed im unin, kin wot an kar aetok kitien an jako jen mwin ekoba an jab inebata kake im kea kin wawein ko rekar bok jikier ikijen mwin iumin 40 jima iio ko. Wawein kein ear kommani im jab kommani, ilo watoke, rej koba in, botap ejjab tarlep in aolep, wawein kein:

- i. kojekdron eddo eo an nan mwin im jab kajitok kake jekjek im wawein ko nan kojbarok e bwe en jab joran; im

- ii. kojekdron eddo eo an ilo an jab kebaak kora ro jatin, Tarina Abo im Tarbwij
Lelwoj, im kajitikin erro kake aero kar jortoklik kake mwin ilo aer kar muri
ikijen nan komman e jermal in kokaal ko nan e; im
- iii. kojekdron eddo eo an nan konanik lok ro aer Teron ilo aolepen iio ko rellon
ikijen mwin; im
- iv. an ba ej kottar wot bwe ren kwalok jikin an bed ilo juon ian rum ko ilo mwin
tore ko ej kakije tok jen Amedka.

Innem Court in ej loe bwe ilo an ro aer bwidej eo kile Tarina einwot armij eo ear mour, jokwe, im bareinwot eddo kake mwin etarbok, ej juon wawein im jekjek eo ewor bedbed in im un ko rekka iumin manit, einwot ke Nerissa ear emakit im ajelok mwin nan Tarina ilo 1982 eo. Kin menin, maron eo an alap eo nan boke mwin im ajelok nan bar juon armij ear juon jekjek im wawein eo ear bok jikin ekkar nan mantin Majol. *Lokar v. Latak*, 6 TTR 375.

B. Elane uak eo an Kajitok 1 ej “aet”, innem, iumin mantin Majol, ejimwe im ekkar ke an Alap eo ej binej jenkwon eo im ear ajelok imon jokwe in nan rialal eo jen bamle eo, jilkinlok rialal eo im bamle eo an jen imon jokwe eo im koroole nan armij eo ear kalok mwin?

- Ejelok bedbed im unin an alap eo rainin kojekdron koon eo jen alap eo moktalok, eo im ear kaamnak e Tarina im komaron e bwe en mour im jokwe ilo mwin iumin 27 iio ko.

Ilo case eo an *Lokot and Kabua v. Kramer, et al.*, 2 MILR 89 (1997), Supreme Court eo ear erra ilo an kar High Court kajej tokjen im jolok abnono eo nan jilkinlok rijumae abnono ro jen bwidej eo rekar jukjuk im amnak ie iumin 15 iio. Supreme Court eo ear ba bwe “...ejjab jimwe im jejjot an riabnono rein walontak kin abnono eo elkin an mootlok 15 iio jen ien eo rijumae abnono eo ear jino jukjuk im amnak ilo bwidej...”

Ejja ilo wawein in wot, Nerissa im alap eo rainin rej kadriojlok Sophia im Tarbwij jen mwin elkin 27 iio ko im rar kokaale im jokwe im amnak ie kin koon eo jen alap moktalok.

Ak bar juon wawein, riabnono ro, ak Tarbwij im Sophia, koba lok ibben lollap eo karejeran Tarbwij im emoj an jako ilo kilaan mej, rekar maron jino jukjuk im amnak ie im kollaik muri eo an imon jokwe in ilo 1996 eo. Sophia, ilo mool, ear jokwe mwin etarbok jen 1996 eo, ak ritto ro jinen im jemen, im emoj aer jino kolla lok nan muri eo an mwin, rekar bed im jokwe ilo Maloelap mokta jen aer emakit tok nan Majuro. Mekarta, Tarbwij im lollap eo karejeran rekar wonmanlok wot im kommane kolla ko nan muri eo an mwin mae juon tore ilo 2022 eo.⁴ Muri eo an mwin emoj an dredrelok im maat ilo an Tarbwij kar kojberbal kolla ko jen wonan an lollap eo karejeran jermal im jen kolla ko jen social security eo an elkin an mej.

Kin menin, Court in ej loe bwe Nerissa ear mour im jokwe ilo Amedka iumin 40 jima iio ko. Ear jab komman jabrewot wawein ko ikijen money ko ak jaan im wawein ko iumin manit nan jiban ikijen mwin ilo aolep iio kein. Ak Court in loe bwe riabnono rein rekar mour im jokwe ilo mwin etarbok iumin 27 iio ko. Rekar jab bed im mour wot ilo mwin iumin 27 iio ko, ak rekar bareinwot kojberbal jaan ko aer im kommani eddo ko ikijen mantin bwidej ilo aer kate kojbarok bwe mwin en bed wot ibben bamle eo ekkar nan kalimur eo an Tarina.

Im ilo an ejelok wawein ko kommani rejjab ekkar iumin manit, Court in ej loe bwe aer jilkinlok Sophia, im lellap eo jinen Tarbwij, jen mwin elkin 27 iio in aer bed im jokwe ie, im kojbaroke ilo aer kommani eddo ko ikijen mantin bwidej, im kollaik aolepen muri eo nae mwin, ej juon jekjek im wawein eo ejjab emman im ekkar iumin mantin Majol. *Lokot and Kabua v. Kramer, et al.*, 2 MILR 89 (1997).

⁴ Plaintiff's Exhibit C.

C. Iumin mantin Majol, ewor ke an Alap eo maron nan an kotlok an rialal eo an imon jokwe in kokaal e im kolaplok mwin?

- Aet, mantin Majol ej kemlet bwe ewor an Alap eo maron nan kotlok an rialal eo im mwin etarbok emoj lelok nan e, bwe en kokaal e im kolaplok.

Court in ej loe bwe kin an kar etal nan Tarina mwin etarbok, ro aer bwidej eo, ak Alap eo, kobalok ibben Senior Dri Jerbal eo, ear bed maron eo nan komelim i bwe en kokaal im kolaplok mwin. Court in ej bareinwot loe bwe naan in kamool ko an SDJ Betty ikijen manit, ilo an ba bwe juon alap emaron bok juon imon jokwe eo emoj an armij eo mwon mweo emakit jen e im joloke, innem tokelik ajelok mwin nan bar juon armij, ej juon wawein eo ejimwe im ekkar iumin mantin Majol. *Lokar v. Latak*, 6 TTR 375 (“*Lokar*”).

Ilo case eo an *Lokar*, alap im senior dri jermal eo rar lelok melim nan rijumae abnono eo bwe en kalok juon an imon jokwe ilo bwidej eo. Court eo ilo case eo ear ba bwe ejja ilo nememein wot, maron eo nan an alap eo komakit rijumae abnono eo jen bwidej eo ej juon jekjek im wawein eo ejimwe im ekkar iumin mantin Majol. Court in ej loe bwe ilo case in, melim eo jen Alap im Senior Dri Jerbal ro nan Tarina, im tokelik Tarbwij, nan kokaal im kolaplok mwin ejimwe im ekkar iumin mantin Majol.

Mene emoj an Tarina jako ilo kilaan mej im jab maron kamool kake koon eo ear kommane ibben Nerissa, im tokelik ibben Tarbwij, ilo mool ilo an kar jab kajeor im lelok eddo eo nan kolla ki muri eo nae mwin nan Nerissa ej kalikar nan Court in ke emoj an tot im bin kolmenlokjen im jela eo an ke emoj an jako an imon Nerissa mwin.

Ilo bar juon wawein, Tarbwij ear ba ilo naan in kamool ko an ke Tarina ear kajjimwe lok nan e im kajitok ibben bwe en bok eddo in muri eo ear boke im jortoklik kake mwin nan bobrae jen an MIDB naj boke elane enaj bojrak jen an kommani kolla ko nan e. Court in ej loe bwe

kajitok eo an Tarina nan Tarbwij ej juon eo ewor bedbed in nan kommane einwot juon kar rialal im tokelik ej imon.

Ilo an Tarbwij kar wonmanlok wot im kollaik muri eo jen kolla ko an lollap eo karejeran, im tokelik kin kolla ko jen opij eo an Marshall Islands Social Security Administration elkin an jako, rej kalikar nan Court bwe Tarbwij, ekoba lollap eo karejeran im kora eo nejin, rar jab kommane wawein kein itokwot jen koon eo an Tarina wot, ak rar bareinwot kommane eddo ko aer einwot jet ro rej bed im tomak ke mwin ej mweer ilo wawein aer kojerbal money ak jaan ko aer im kommane tartok in bebe ko ion bwidej.

Court in ej loe bwe ear jabwe kein kamool nan an Nerissa jumae melele ko an riabnono rein ilo aer ba bwe Tarina ear etal mwin nan e einwot juon mwon, im tokelik ear kajitok bwe Tarbwij en kollaik muri eo mwin, ilo an kile ke ej juon eo enaj binej jenkwon.

Court in ej bareinwot loe bwe Nerissa ear jab kajitkin Tarina ilo an kar jortoklik kin nan an muri im kar kokaal e. Nerissa ear ba ilo naan in kamool ko an bwe ejelok unin an ba jabrewot bwe elak itok emoj an dedrelok jerbal in kokaal ko nan mwin.

Kin menin, Court in ej loe bwe Alap ro ear jab ella lok jen maron eo an iumin manit ilo an kotlok Tarina, rialal eo emoj an oktak im mwon mwin, bwe en kokaal im kolaplok mwin etarbok.

D. Elane uak eo an Kajitok 3 ej “aet”, iumin mantin Majol, ewor ke an Alap ak rialal eo eddo, in kajitok melim eo an armij eo ear kalok imon jokwe eo (im ejelok an maron ion bwidej eo) mokta jen an Alap eo lelok melim bwe en jino komman jerbal in kokaal e im kolaplok mwin?

- Iumin mantin Majol, armij eo mwon mwon (im ejelok an maron ion bwidej eo) ej an eddo bok melim jen ibben ro aer bwidej eo nan kokaale mwon jokwe eo. Im ej an alap eo eddo lelok melim nan an juon armij kokaal moko ion bwidej eo an.

Einwot an walok melele ko maan lok, ro aer bwidej eo remaron, iumin manit, lelok melim nan Tarina, rialal eo emoj an oktak im imon mwin etarbok, bwe en kokaale im kolaplok. *Id.*

Einwot juon eo imon mwin, Tarina ear aikuij kar bok melim jen ibben Alap im Senior Dri Jerbal ro nan an maron kabin kalimur eo nan kollaik muri eo boke nan kommane jermal ko nan kokaale mwin. Alap eo ear jab aikuij in bok melim jen Tarina einwot juon eo imon mweo, ak jen ibben Nerissa, eo im ear kalok mwin, elane emoj kar ajelok mwin nan Tarina.

Naan in kamool ko rej kalikar ke aolep jermal in kokaal ko rekar kommani ilo mwin, im money ak jaan ko rekar maron in jermal nan kokaal e, rekar tobrak ilo an ejelok jermal in etale im kwelok ko kommani ibben Nerissa. Botap ear wor jermal in etale im kwelok ko rekar komman ikotaan Tarina, rialal eo jinoin im emoj an kio oktak im mwon mwin, im Alap im Senior Dri Jerbal ro an Teron ilo tore eo.⁵ Wawein in ejimwe im ekkar iumin mantin Majol.

E. Elane uak eo an Kajitok 3 ej “aet” im uak eo an Kajitok 4 ej “jaab”, innem ewor ke an Alap eo maron nan an ajelok mwin nan rialal eo im ear bok eddo in jermal in kokaal e im kolaplok mwin im jab armij eo ear kalok mwin jinoin, ilo an kar ejelok enaan nan armij eo ear kalok mwin jinoin jen ibben rialal eo ak Alap eo?

- Aet, iumin mantin Majol, ewor an Alap eo, kobalok ibben Senior Dri Jerbal eo, maron in ajelok imon jokwe eo nan rialal eo ear bok eddo in kommane jermal ko nan kokaale im kolaplok mwin.

Einwot an walok ilo melele ko imaan, ilo an ejelok Irojlaplap ak Irojdedrik ilo Teron, Alap im Senior Dri Jerbal ro einwot jet ro im ej aer bwidej eo, rej maron, iumin

⁵ Plaintiff's Exhibit B.

manit, ajelok mwin watok emoj joloke nan bar juon armij elkin aer boke. Ilo case in, ro aer bwidej in rar ajelok mwin nan Tarina. Ejimwe im ekkar, einwot an wor bedbed in, an alap eo bareinwot kile eo ej binej jenkwon Tarina, einwot Tarbwij im jab Nerissa, einwot juon eo imon mwin etarbok.

Court in ej loe bwe kein kamool kein, ilo tarlepie, rej rie naan in iakwelel ko im rej ba bwe ear etal mwin etarbok nan Tarina jen ibben ro aer bwidej eo, innem tokelik ear lelok mwin nan Tarbwij. Jekjek im wawein eo in ear walok im alikar iumin 27 iio ko.

F. Ilo an jako rialal eo im mwin ear etal nan e bwe en kojbaroke ilo torę eo armij eo ear kalok mwin ear emakit jen Teron Weto, iumin mantin Majol, melim eo jen Alap eo ear ke bareinwot etal nan rialal eo jen Alap eo, bareinwot etal nan eo ear bok jikin rialal eo im men ko mweien, elane ear ejelok kojela im enaan ko ibben armij eo ear kalok mwin jinoin?

- Iumin mantin Majol, melim eo jinoin im ear etal nan rialal eo nan an kokaal im kolaplok imon jokwe eo naj bareinwot etal nan eo enaj bok jikin im binej jenkwon.

Einwot an walok ilo melele ko maanlok, kin wot an moj an etal mwin bwe en imon Tarina, rialal eo jinoin an mwin, innem ejja ilo wawein in wot, einwot juon eo ej kio imon mwin, kajitok eo an bwe Tarbwij en bok eddo in muri eo boke ikijen mwin etarbok ej melelein ej ajelok eddo eo an mwin nan Tarbwij. Im einwot ke Tarbwij im bamle eo an rekar bed im mour ilo mwin etarbok iumin 27 iio, rekar maron in kollaik aolepen muri eo im kokaal im kolaplok imon jokwe eo kin melim eo jen ibben ro aer bwidej eo.

Ej alikar bwe einwot juon eo im Tarina ear lelok eddo in mwin nan e, Tarbwij, ekoba bamle eo an, rekar jab jokwe wot ilo mwin, ak ekar bareinwot lap aer jolok elap ien ko aer im kojerbal men ko mweier raurok nan mwin. Ilo an ro aer bwidej eo kile riabnono rein einwot ro rej bwinej jenkwon Tarina, Court in ej loe bwe ej juon wawein eo

ejimwe im ekkar ilo mantin Majol. Mantin Majol eo im ej ba jen kile im jela nae dron, im iakwe dron, ej kemlet bwe jekjek im wawein an Tarbwij im bamle eo an komaat aer maron kakirmool kalimur eo an Tarina ilo aer kar kojbarok mwin im kollaik muri eo ear jortoklik kake mwin im boke, ej menin nebar, kautej im kamolol kake.

Kin menin, Alap eo, kobalok ibben Senior Dri Jerbal eo, ej maron in ajelok imon jokwe eo nan Tarina, im ilo an jako kin kilaan mej, kotloke lok nan eo ej binej jenkwon Tarina im kein kamool kein rej kalikar ke ej Tarbwij.

G. Ewor ke jabrewot karok, iumin mantin Majol, ikijen kajitok eo nan lale won eo ejimwe im ekkar an bok imon jokwe in emoj kalok e ilo bwidej eo ejelok an eo ear kaloke maron ion, im ilo an lonlok jen juon armij eo ear bok eddo in kommane jerbal in kokaal im kolaplok ko ilo mwin ekkar nan melim eo lelok jen Alap eo?

Einwot an walok ilo melele ko lok maan, mantin Majol ej kemlet bwe juon alap ej an eddo lale jabrewot karokan jerbal ko ion bwidej eo einwot ke ej jeban bwij eo, ilo an kebaak Irojilaplap, Irojiedrik ijoko rekkar, im Senio Dri Jerbal ro. Const. Art. X, Sec. 1(2); J. A. Tobin, *Land Tenure in the Marshall Islands* at 6-11 (1956).

Court in ej loe bwe ilo an ejelok Irojilaplap ak Irojiedrik an Teron, Alap im Senior Dri Jerbal ro rej maron ko iumin manit nan lelok melim bwe juon armij en maron kalok juon an imon jokwe im jukjuk im amnak ilo bwidej eo, einwot ilo case eo an *Lokar*.

Elkin etale kein kamool ko, Court in ej loe bwe Tarina ear etal nan e melim eo jen ibben ro aer bwidej eo, Alap im Senior Dri Jerbal ro, nan kokaal im kolaplok imon jokwe eo, bedbed ion melele eo ke ejako an mwon Nerissa. Melim eo ear tokelik etal nan ro rekar jukjuk im amnak ilo mwin, ak riabnono rein.

Court in ej bareinwot loe bwe Tarina, ilo an kar etal melim in nan kokaal e imon jokwe in im jortoklik kake, ear maron in lelok eddo eo nan kollaik muri eo an imon

jokwe in nan Tarbwij. Tarbwij, im bamle eo an, rekar maron in jokwe im kolla lok nan muri eo ear komman ikijen mwin iumin 27 iio ko. Ilo iio kein 27 im rekar jokwe ilo mwin im kollaiki muri eo nae mwin, ear ejelok an alap ak senior dri jermal eo nirbokat ko ak enjake ikijen wawein ko kommani iumin manit im naj kar menin aer komakit ir jen mwin. Mae tore eo Nerissa ear etal ibben Alap Carmen nan komakit im jilkinlok Sophia jen imon jokwe eo.

Ilo naan in kamool ko an, Alap Carmen ear ba bwe ej jutok likin im rie Nerissa ilo an ba ej bar boke imon jokwe in einwot ke tomak eo an, Nerissa ej lukin armij eo im mwon imon jokwe in. Ijowotke, SDJ Betty ejjab erra ilo an emakit im drijlok riabnono rein. Ear ba ilo naan in kamool ko an ke jemlok eo an ro moktalok jen e, ak Alap Jelke Jenre im Senior Dri Jermal Labi Tibon, ear jimwe ilo aer kar kommane, im enaj kile armij eo emaron kwalok pepa ko rej kamool ke rej jet ro ekkar bwe ren jokwe ilo mwin etarbok einwot mweer.

Court in ej loe bwe ilo an Alap Carmen make kin maron eo ibben, Nerissa ejjab maron in bar boke mwin im jilkinlok Sophia elane Alap im Senior Dri Jermal ro imaanlok rekar watok ke Nerissa ear emakit im joloke mwin, im ajelok nan bar juon armij. Court in ej loe bwe tore eo ear jako Nerissa ej 40 jima iio aetokan im ilo am keidi ibben tore eo riabnono rein rekar jokwe mwin etarbok im ej 27 iio aetokan, ej juon jekjek eo elap tokjen ilo kolmenlokjen kake im kile bwe Tarbwij ej armij eo ekkar bwe en etal mwin etarbok nan e einwot juon mwon make ekkar nan manit. Emoj an Supreme Court eo ba bwe 15 iio ilo an juon armij bed im mour ilo juon jikin ej juon tore eo eaetok im bwe nan jilkinlok ak komakit juon armij jen bwidej eo ej juon jekjek im wawein eo ejjab jimwe im ekkar. *Lale Lokot and Kabua v. Kramer, et al.*, 2 MILR 89 (1997).

IV. Naan in Kojjemlok

Nan kojemlok naan kein, Court in ej loe bwe ekkar nan mantin Majol, Tarbwij Lelwoj ej armij eo ekkar bwe en bok einwot juon mwon make mwon etarbok, im ej bed ilo Teron, bukon in Rita, aelon in Majuro.

Dated: 14 March 2025.



Grace L. Leban
Chief Judge
Traditional Rights Court



Nixon David
Associate Judge
Traditional Rights Court



Claire T. Loeak
Associate Judge
Traditional Rights Court